

## PENENTUAN SIFAT KEFUNGSIAN SERBUK RUMPAI LAUT *KAPPAPHYCUS ALVAREZII*

(Determination of the functional properties of *Kappaphycus alvarezii* seaweed powder)

Sjamsiah<sup>1,2\*</sup>, Nazaruddin Ramli<sup>1,3</sup>, Rusli Daik<sup>1</sup>, Mohd. Ambar Yarmo<sup>1</sup>

<sup>1</sup>Pusat Pengajian Sains Kimia dan Teknologi Makanan, Fakulti Sains dan Teknologi  
Universiti Kebangsaan Malaysia, 43000 UKM Bangi, Selangor D.E.

<sup>2</sup>Jurusan Kimia, Fakultas Sains dan Teknologi  
Universitas Islam Negeri Alauddin Makassar, Indonesia

<sup>3</sup>Pusat Inovasi Teknologi Manisan (MANIS), Fakulti Sains dan Teknologi  
Universiti Kebangsaan Malaysia, 43000 UKM Bangi, Selangor D.E.

\*Corresponding author: sjamsiahuca@yahoo.com

### Abstrak

Serbuk rumpai laut *Kappaphycus alvarezii* yang diperolehi secara pengeringan semburan (SD), sejuk-beku (FD) dan pengeringan cahaya matahari (SND) telah ditentukan sifat kefungsiannya iaitu keupayaan membengkak (SWC), keupayaan memegang air (WHC), keupayaan memegang minyak (OHC), kelikatan dan kekuatan gel. Hasil kajian memperlihatkan bahawa serbuk rumpai laut *Kappaphycus alvarezii* yang diperolehi secara FD dan SND mempunyai keupayaan membengkak masing-masing 25 mL/g dan 50 mL/g manakala serbuk SD memberikan hasil campuran yang sekata dan sangat likat (SWC 100 mL/g). Hasil penentuan WHC serbuk SND (30.67 g/g) didapati lebih tinggi ( $p < 0.05$ ) daripada serbuk FD (21.33 g/g) dan serbuk SD (4.67 g/g). Nilai OHC serbuk FD (19.81 g/g) adalah lebih tinggi ( $p < 0.05$ ) daripada serbuk SD (5.11 g/g) dan serbuk SND (4.67 g/g). Manakala nilai kelikatan serbuk FD, SND dan SD masing-masing adalah 0.22, 0.17 dan 0.06 Pa.s. Sementara itu, kekuatan gel serbuk SD (82.77 gf) adalah lebih tinggi ( $p < 0.05$ ) daripada serbuk FD (57.1 gf) dan serbuk SND (35.01 gf). Hasil penentuan sifat kefungsiannya ini menunjukkan bahawa serbuk SD paling berpotensi untuk diaplikasikan sebagai pengubahsuaian kelikatan pada pembuatan produk minuman.

**Kata kunci:** pengeringan, serbuk rumpai laut, *Kappaphycus alvarezii*, sifat kefungsiannya

### Abstract

Seaweed *Kappaphycus alvarezii* powder prepared by spray drying (SD), freeze drying (FD) and sun drying (SND) were determined their functional properties such as swelling capacity (SWC), water holding capacity (WHC), oil holding capacity (OHC), viscosity and gel strength. The study showed that the *Kappaphycus alvarezii* seaweed powder obtained by FD and SND have the ability to swell to 25 mL/g and 50 mL/g respectively, while the SD powder formed a homogeneous solution and it exhibited highly viscous solution (SWC 100 mL/g). The WHC of SND powder (30.67 g/g) was higher ( $p < 0.05$ ) than the FD (21.33 g/g) and SD (4.67 g/g) powders. The OHC of FD powder (19.81 g/g) was higher ( $p < 0.05$ ) than the SD (5.11 g/g) and SND (4.67 g/g) powders. While the viscosity of the FD, SND and SD powders were 0.22, 0.17 and 0.06 Pa.s respectively. Meanwhile, the gel strength of the SD powder (82.77 gf) was higher ( $p < 0.05$ ) than the FD (57.1 gf) and SND (35.01 gf) powders. These results on determination of functional properties shows that the SD powder had the most potential to be applied as a viscosity modifier in the manufacturing of beverages.

**Keywords:** drying, seaweed powder, *Kappaphycus alvarezii*, functional properties

### Pengenalan

*Kappaphycus alvarezii* adalah sejenis rumpai laut yang banyak ditanam di kawasan perairan Sabah, Malaysia. Ia merupakan komoditi yang mempunyai nilai ekonomi yang tinggi dan merupakan sumber penghasilan kappakaragenan serta sumber penting gentician diet [1, 2]. Dalam struktur rumpai laut, polisakarida mampu mengikat air hingga 20 kali lebih besar daripada isi padunya dan keupayaan ini berkait rapat dengan struktur panjang dan tebal partikel serat rumpai laut itu [2]. Polisakarida yang memiliki afiniti tinggi terhadap air (hidrokoloid) menunjukkan

sifat kefungsiannya unik seperti sifat gel dan kelikatan yang berperanan penting dalam pembaikan tekstur, pembentukan gel, kelikatan dan sebagainya [2, 3].

Pada masa kini, beberapa serbuk hidrokoloid seperti gam arabik, gam xantan, karagenan dan karboksilmetil selulosa telah digunakan secara meluas di dalam industri makanan, minuman dan juga industri bukan makanan [4]. Sebagai contoh dalam industri makanan dan minuman, hidrokoloid digunakan dalam pembuatan produk jeli, sos, konfeksi, sirap, puding, dodol, makanan sejuk-beku, produk susu dan lain-lain [5, 6]. Dalam industri makanan, hidrokoloid digunakan sebagai kontrol sifat kefungsiannya produk makanan [7]. Walaupun penggunaannya dalam jumlah kecil (0.01-2%) namun ia dapat memberikan perubahan pada tekstur produk makanan [6, 8]. Beberapa sifat kefungsiannya yang penting larutan hidrokoloid adalah kelikatan dan kemampuan mengikat air [8]. Selain itu, hidrokoloid juga digunakan dalam formulasi makanan sebagai penstabilan emulsi, menghindari pengkristalan ais dan pembaikan nilai sensori [8, 9].

Ciri-ciri galian diet rumput laut yang berkaitan dengan sifat fizikokimianya seperti keupayaan membengkak (SWC), keupayaan memegang air (WHC) dan keupayaan memegang minyak (OHC) sangat penting untuk memperbaiki sifat-sifat kefungsiannya di dalam makanan dan minuman [10]. Sifat kefungsiannya rumput laut tersebut sangat sensitif terhadap kaedah penyediaan dan proses pengeringan [3, 11]. Oleh itu, kajian ini bertujuan untuk menentukan sifat kelikatan, kekuatan gel, keupayaan memegang air, keupayaan membengkak dan keupayaan memegang minyak serta bentuk morfologi serbuk rumput laut *Kappaphycus alvarezii* yang dihasilkan secara pengeringan matahari, semburan dan sejuk-beku. Kajian ini akan membantu memahami hubungan antara proses pengeringan dan sifat fungsi serbuk rumput laut *Kappaphycus alvarezii* dan juga memberikan maklumat yang bermanfaat mengenai aplikasinya dalam industri makanan.

#### **Bahan dan Kaedah**

Rumput laut *Kappaphycus alvarezii* kering diperolehi dari kawasan perairan Sabah Malaysia. Sebelum dianalisis, rumput laut *Kappaphycus Alvarezii* dibasuh dengan air paip yang mengalir untuk membersihkan kotoran dan bendasing seperti garam, pasir, kekerang dan lain-lain. Kemudian, ia direndam dalam air suling selama semalaman (24 jam) untuk melunturkan warna kekuningan daripada rumput laut menjadi tidak berwarna (jernih). Seterusnya sampel ditapis dan dikeringkan di bawah cahaya matahari selama 3 hari. Rumput laut yang telah dikeringkan dipotong kecil-kecil sebelum digunakan pengisar tukul dengan saiz lubang penapis 3 mm, dan penapis 0.25 mm untuk mendapatkan serbuk rumput laut yang halus. Dalam kajian ini, serbuk rumput laut dihasilkan dengan menggunakan peralatan *spray dryer* jenama Lab Plant SD-05, England UK dan alat pengeringan sejuk beku model Epsilon 1-8 D Christ, Germany. Parameter-parameter yang digunakan dalam kajian telah diubahsuai mengikut keberkesanan proses pengeringan dan kualiti serbuk rumput laut yang dihasilkan.

#### **Mikroskopi Elektron Imbasan (SEM)**

Mikroskopi elektron imbasan (SEM, model LEO 1450 VP Jenama LEO) digunakan untuk melihat bentuk permukaan dan saiz serbuk rumput laut yang diperolehi dengan kaedah pengeringan matahari, semburan dan sejuk-beku.

#### **Keupayaan membengkak (SWC)**

Keupayaan membengkak (SWC) sampel rumput laut diukur melalui penentuan isi padu lapisan (*bed volume*) selepas keseimbangan dalam pelarut berlebihan [12]. Sampel serbuk rumput laut 100 mg dimasukkan dalam silinder 25 ml, ditambah 10 ml air suling nyah ion dan campuran dikacau secara bersungguh-sungguh. Silinder penyukat dibiarkan selama 24 jam pada suhu 25°C. Pembengkakan atau pengembangan isipadu diukur dan dinyatakan sebagai mililiter sampel bengkak per gram sampel.

#### **Keupayaan memegang air (WHC)**

Keupayaan memegang air oleh sampel serbuk rumput laut diukur dengan kaedah pengemparan yang diubahsuai [13]. Air suling nyah ion sebanyak 10 mL ditambah ke dalam tiub pengemparan bersenggat yang mengandungi 100 mg sampel, kemudian digetar (150 rpm) dalam rendaman air selama 24 jam pada suhu 25°C. Pada akhir masa getaran, tiub diemparkan pada 10,000 rpm pada suhu 25°C selama 30 minit (menggunakan alat pengemparan model Centrifuge

5810 R). Isipadu lapisan bahagian atas diukur dan keupayaan memegang air dinyatakan sebagai berat gram air yang dipegang oleh 1 gram berat sampel serbuk rumpai laut kering.

#### **Keupayaan memegang minyak (OHC)**

Keupayaan memegang minyak sampel serbuk rumpai laut ditentukan dengan kaedah yang dijelaskan oleh Capres et al. [14] dan Wong & Cheung [15] dengan sedikit pengubahsuaian. Sebanyak 150 mg sampel serbuk rumpai laut diletakkan dalam tiub emparan bersengat dan ditambahkan minyak jagung sebanyak 10 mL. Tiub dibiarkan selama 30 minit pada suhu 25 °C dengan getaran 150 rpm. Campuran kemudiannya diempar pada 4000 rpm selama 30 minit. Lapisan minyak dikeluarkan dan isipadunya diukur. Keupayaan memegang minyak sampel serbuk rumpai laut dinyatakan sebagai gram minyak dipegang oleh 1 g sampel serbuk rumpai laut kering. Ketumpatan minyak jagung adalah 0.92 g/mL.

#### **Kelikatan**

Kelikatan diukur mengikut kaedah Monuz et al. [16]. Sampel serbuk rumpai laut 30 mg dilarutkan dalam 20 mL air suling nyah ion panas (sebaran 1.5% w/v) bersuhu 90 °C dan digerak-gerakkan menggunakan pengacau magnet selama 20 minit. Kelikatan sebaran rumpai laut 1.5 % (w/v) diukur menggunakan alat Anton Paar, Physica MCR 301, kon pengukur CP50-1.

#### **Kekuatan gel**

Serbuk rumpai laut sebanyak 45 mg dilarutkan dalam 30 mL air suling nyah ion panas (larutan sebaran 1.5% w/v) pada suhu 90 °C dan digerak-gerakkan menggunakan pengacau magnet selama 20 minit. Larutan yang terhasil dituang ke dalam botol kaca acuan 50 mL dengan diameter dalaman 4 cm, dibiarkan dingin kemudian disimpan dalam petisejuk pada suhu 4°C semalaman (18 jam). Analisis kekuatan gel menggunakan Texture Analyzer, Autograph, Shimadzu, dengan sebuah lekapan dan prob analisis 1 cm ditekan pada sampel hingga kedalaman 70% daripada tinggi asalnya dan kelajuan 1 mm<sup>s</sup><sup>-1</sup>. Setiap pengukuran dilakukan sebanyak tiga kali.

### **Hasil dan Perbincangan**

#### **Mikroskopi Elektron Imbasan (SEM)**

Analisis Mikroskopi Elektron Imbasan (SEM) dilakukan untuk melihat bentuk permukaan dan saiz serbuk rumpai laut yang diperolehi secara pengeringan semburan (SD), sejuk-beku (FD) dan cahaya matahari (SND). Hasil menunjukkan ketiga-tiga kaedah pengeringan memberikan bentuk permukaan serbuk yang berbeza (Rajah 1). Serbuk SD mempunyai bentuk teratur seperti bola dan berdiameter sekitar 1.5-14.2 µm. Serbuk FD dan serbuk SND mempunyai bentuk tidak teratur yang disebabkan oleh potongan pengisar yang digunakan pada proses pemerolehan serbuk halus. Namun serbuk FD mempunyai bentuk lembaran yang lebih nipis, halus dan ringan berbanding dengan serbuk SND. Hal ini mungkin disebabkan oleh proses pengeringan FD di mana sampel kering yang digunakan terlebih dahulu dibuat sebaran rumpai laut 0.5 % w/v kemudian disejuk-bekukan dan dikeringkan dengan proses pemejalwapan.


Bentuk struktur permukaan dan saiz serbuk rumpai laut *Kappaphycus alvarezii* yang diperolehi dengan kaedah pengeringan yang berbeza menunjukkan terdapatnya hubung-kait dengan sifat kefungsiannya. Hal ini sesuai dengan kajian lepas yang menyatakan bahawa keupayaan memegang air oleh polisakarida rumpai laut berkait rapat dengan struktur panjang dan tebal partikel serat rumpai laut [2].

#### **Sifat kefungsiian**


Secara amnya, serbuk rumpai laut yang kaya serat ditentukan sifat penghidratannya, SWC (*swelling capacity*), WHC (*water holding capacity*) dan OHC (*oil holding capacity*) [10]. Hasil kajian sifat SWC ditunjukkan pada Rajah 2, di mana serbuk SD memperlihatkan suatu campuran yang sekata dan likat sehingga boleh dikatakan bahawa serbuk SD mempunyai nilai SWC 100 mL/g. Sementara itu, sebaran serbuk rumpai laut FD dan SND memperlihatkan ada lapisan bahagian bawah yang membengkak. Rajah 3 menunjukkan nilai SWC serbuk SD (100 mL/g) paling tinggi berbanding serbuk SND (50 mL/g) dan serbuk FD (25mL/g).

Sifat WHC dan OHC serbuk rumpai laut ditunjukkan pada Rajah 4. Hasil pengamatan menunjukkan WHC serbuk SND (30.67 g/g) lebih tinggi daripada serbuk FD (21.33 g/g) dan serbuk FD lebih tinggi daripada serbuk SD (4.67

g/g). Manakala sifat fungsi OHC serbuk FD (19.81 g/g) lebih tinggi daripada serbuk SD (5.11 g/g) dan serbuk SD lebih tinggi daripada serbuk SND (4.67 g/g). OHC adalah sifat fungsi bahan makanan yang digunakan dalam formulasi makanan. Serbuk rumpai laut dengan nilai OHC yang tinggi memberikan kestabilan ke atas emulsi dan makanan yang berlemak tinggi [9, 15].



Rajah 1. SEM serbuk rumpai laut *Kappaphycus alvarezii* keringan matahari (a), sejuk-beku (b) pada pembesaran 100x dan semburan (c) pada pembesaran 250x




Rajah 2. Sebaran rumpai laut 1 % w/v membentuk *swelling* (bengkak)

Hasil kajian sifat fungsi SWC, WHC dan OHC daripada serbuk rumpai laut *Kappaphycus alvarezii* yang diperolehi secara SD, FD dan SND telah memberikan nilai yang berbeza. Hal ini disebabkan oleh bentuk permukaan dan saiz serbuk rumpai laut yang berbeza. Untuk nilai SWC yang tertinggi dimiliki oleh serbuk SD di mana bentuk butiran serbuk SD menyerupai bola yang seragam serta mempunyai saiz diameter kecil (1.5  $\mu\text{m}$ ) yang banyak sehingga


mampu menyerap air secara rata dan membengkak kemudian seterusnya membentuk larutan yang sangat likat. Manakala nilai WHC yang tertinggi adalah serbuk SND di mana bentuk dan saiz partikel serbuk SND lebih tebal dan panjang sehingga mampu memegang air lebih banyak. Hasil kajian mendapati bahawa semakin tebal dan panjang partikel serat rumpai laut maka semakin tinggi keupayaan memegang air. Sementara itu, serbuk FD memberi nilai OHC yang tertinggi. Pada dasarnya mekanisme OHC disebabkan oleh pemerangkapan fizikal minyak oleh tarikan kapilari [17]. Selain itu, menurut Elleuch et al. [9] sifat OHC adalah berkaitan dengan sifat-sifat permukaan, ketumpatan, juzuk lipofilik dan hidrofilik.

Beberapa kajian lepas melaporkan bahawa nilai-nilai fungsi SWC, WHC dan OHC sukar untuk dibandingkan antara satu rumpai laut dengan yang lain disebabkan mereka tergantung pada kaedah penyediaan sampel, kaedah pengeringan, saiz dan keporosan sampel serta keadaan eksperimen (masa, suhu dan kadar pengemparan) [ 9, 10, 15].




Rajah 3. Keupayaan membengkak serbuk rumpai laut *Kappaphycus alvarezii*

Hasil pengukuran kelikatan sebaran rumpai laut *Kappaphycus Alvarezii* 1.5% w/v ditunjukkan pada Rajah 5. Sifat aliran sebaran rumpai laut *Kappaphycus Alvarezii* 1.5 %w/v menurun dengan meningkatnya kadar ricih. Ini menandakan bahawa aliran bersifat pseudoplastik (penipisan ricih). Kelikatan serbuk FD pada kadar ricih 100 Hz, suhu 25°C (0.22 Pa.s) lebih tinggi daripada serbuk SND (0.17 Pa.s) dan serbuk SND lebih tinggi daripada serbuk SD (0.06 Pa.s).. Ini kemungkinan disebabkan adanya perlakuan suhu tinggi pada pengeringan semburan yang boleh merosakkan struktur biopolimer, seperti yang dilaporkan oleh [3] bahawa suhu udara masuk dan kelajuan penggabuss yang tinggi pada pengeringan semburan mempunyai sifat kelikatan dan penipisan kadar ricih yang kecil. Suhu udara masuk yang tinggi dapat mempengaruhi keadaan biopolimer dan menyebabkan degradasi terma struktur molekul, seperti meruapnya sulfat bersama air. Menurut Kinsella [17] *Kappaphycus alvarezii* sebagai penghasil karagenan yang mempunyai sifat kental dan likat bergantung pada kepekatan, suhu, pH, kehadiran molekul-molekul lain, kaedah perlakuan, jenis karagenan dan jisim molekulnya.




Rajah 4. Keupayaan serbuk rumpai laut memegang air dan minyak



Rajah 5. Kelikatan sebaran rumpai laut *Kappaphycus alvarezii* 1.5% (w/v)

Kekuatan gel merupakan salah satu sifat serbuk rumput laut yang utama kerana kekuatan gel menunjukkan kemampuan serbuk rumput laut dalam pembentukan gel. Hasil pengukuran kekuatan gel ditunjukkan pada Rajah 6. Serbuk SD mempunyai kekuatan gel yang tinggi (82.77 gf) dibandingkan dengan serbuk FD (57.1 gf) dan serbuk FD lebih tinggi daripada SND (35.01 gf). Tinggi kekuatan gel pada serbuk SD dibandingkan dengan serbuk FD dan SND disebabkan oleh penggunaan suhu tinggi (160°C) yang boleh mempengaruhi penyusutan kandungan sulfat. Menurut Towle [18], peningkatan kekuatan gel berkadar terus dengan banyaknya kandungan kumpulan 3,6-anhidrogalaktosa dan berkadar songsang dengan kandungan sulfatnya. Semakin kecil kandungan sulfatnya semakin kecil pula kelikatannya tetapi kekuatan gelnya semakin meningkat.



Rajah 6. Kekuatan gel rumput laut *Kappaphycus alvarezii* 1.5 % w/v

### Kesimpulan

Dalam kajian ini, sifat kefungisian dari serbuk rumput laut yang diperolehi secara pengeringan semburan, sejuk-beku dan cahaya matahari telah diselidiki. Ketiga-tiga jenis serbuk menunjukkan sifat fungsi yang unik dan berbeza disebabkan oleh kesan kaedah pengeringan yang berbeza. Serbuk keringan semburan dalam sebaran 1 % w/v memiliki sifat seperti larutan yang sekata dan mempunyai nilai kekuatan gel yang tinggi sehingga ia berpotensi sama ada sebagai pembentuk gel mahupun sebagai pengubah kelikatan. Manakala serbuk keringan matahari mempunyai keupayaan memegang air yang tinggi sehingga ia berpotensi untuk meningkatkan sifat fizik dan struktur di dalam produk makanan. Sementara itu, serbuk keringan sejuk-beku mempunyai keupayaan memegang minyak yang tinggi sehingga ia berpotensi untuk digunakan sebagai penstabil emulsi makanan.

### Penghargaan

Penulis ingin merakamkan penghargaan dan terima kasih kepada pihak UKM dan Jabatan Perikanan Malaysia atas sokongan kewangan (Kod No: STGL-007-2010) serta kemudahan penyelidikan yang diberikan.

### Rujukan

1. Webber, V., de Carvalho S.M., Burreto P.L.M. 2012. Molecular and rheological characterization of carrageenan solutions extracted from *Kappaphycus alvarezii*. *Carbohydrate Polymers* 90: 1744-1749.

2. Venugopal, V. 2009. Marine Products for healthcare. *Functional and bioactivenutraceutical Compounds from the ocean*, 261-311.
3. Wang, Y.,Li D.,Wang L-J., Li, S-J., Adhikari, B. 2010. Effects of drying methods on the functional properties of flaxseed gum powders. *Carbohydrate Polymers* 81: 128-133.
4. Karazhiyan, H., Razavi,S.M.A., Philips, G.O., Fang, Y. 2009. Rheological properties of *Lepidium sativum* seed extract as a function of concentration, temperature and time. *Food Hdrocolloids* 23:2062-2068.
5. Prabhasankar, P., Ganesan, P., Bhaskar, N., Hirose, A.,Stephen, N., Gowda, L.R. 2009. Edible Japaneze seaweed, wakame (*Undaria pinnatifida*) as an ingredient in pasta: Chemical, functional and structural evaluation. *Food Chemistry*, 115: 501-508.
6. Glicksman, M.1983. Food hydrocolloids volume II, 21-95.
7. Garcia-Abuin, A., Gomez-Diaz, D., Navaza, J.M.,Quitans-Riveiro, L.C. 2010. Viscosimetric bahaviour of carboxymethyl cellulose-arabic gum mixtures. A. new step to modeling. *Carbohydrate Polymers* 80: 26-30.
8. Mishra, S., Rai, T. 2006. Morphology and functional properties of corn, potato and tapioca starches. *Food Hdrocolloids* 20:557-556.
9. Elleuch, M., Bedigian, D., Roiseux, O., Besbes, S., Blecker, C. 2011.Dietary fibre and fibre-rich by-products of food processing: Characterization, technological functionality and commercial applications: A review. *Food Chemistry*, 124: 411-421.
10. Benjana, O., Masniyom, P. 2011. Nutritional composition and physicochemical properties of two green seaweeds (*Ulva pertusa* and *U. intestinalis*) from the Pattani Bay in Southern Thailand. *Songklanakarini J. Sci.Technol.* 33: 575-583.
11. Leon-Martinez, F.M., Mendez-Lagunas, L.L, Rodriguez-Ramirez, J. 2010. Spray drying of nopal mucilage (*Opuntia ficus-indica*): Effects on powder properties and characterization.*Carbohydrate Polymers.* 81: 864-870.
12. Kuniak, L., Marchessault, R.H.1972. Study of the cros-linking reaction between epichlohydrin and starch. *Die Starke* 4: 110-116.
13. Suzuki, T., Ohsugi, Y., Yoshie, Y., Shirai, T., Hirano, T. 1996. Dietary fiber content, water holding capacity and binding capacity of seaweeds. *Fisheries Science* 62: 454-641.
14. Caprez, A., Arrigoni, E., Amado,R.,Neukom, H. 1986.Influence of different types of thermal treatment on the chemical composition and physical properties of wheat bran. *Journal of Cereal Science*, 4: 233-239.
15. Wong K. & Cheung P.C. 2001. Influence of Drying treatment on three *Sargassum* species. Proximate composition, amino acid profile and some physic-chemichal properties. *Journal of Applied Phycology* 13:43-50.
16. Monuz, J., Freile-Pelegrin, Y., Robledo, D. 2004. Mariculture of *Kappaphycus alvarezii* (Rhodophyta, Solieriaceae) color strains in tropical waters of Yucatan, Mexico. *Aquaculture* 239: 161-177.
17. Kinsella, J.P.1976. Functional properties of protein in foods:A surfeiy. *Journal of Food Sciences and Nutrition*7: 219-280.
18. Towle GA. 1973. Carragenan. Di dalam: Whister RL (editor). Industrial Gums. Second edition. New York. Academic Press. 83-114.